



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Stephani Balvzii Miscellaneorum Liber ... Hoc est,
Collectio Veterum monumentorum, quæ hactenus
latuerant in varijs codicibus ac bibliothecis**

Baluze, Etienne

Parisiis, 1680

Præfatio Ad Lectorem.

urn:nbn:de:hbz:466:1-14718



PRÆFATIO

AD LECTOREM.

Tertius iste Miscellaneorum liber destinatus est memoriæ virorum quorundam illustrium veteris ævi, quorum gesta damus ex fide scriptorum coætaneorum. Neque verò necesse est multa præfari de hoc consilio meo, cum satis sit ostendisse quid in hoc libro contineatur.

Aldrici Cenomanensis Episcopi gesta, dignissima profectò quæ veniant in manus eruditorum, extant in veteri codice MS. Ecclesiæ Cenomanensis, unde apographum ad nos missum est mendosissimum. Sed nos menda bene multa sustulimus ope quorundam frag-

P R Æ F A T I O.

mentorū ex iisdem gestis ab erudita manu excerptorū, quæ ante hos annos in manus nostras inciderunt. Vnum illic in primis notatu dignum occurrit, nullam mentionem fieri epistolæ illius generalis quam Gregorius IV. in gratiam Aldrici scripsisse dicitur, cuius etiam fragmenta reperiuntur apud Iyonem & Gratianum. Et tamen horum gestorū auctores mentionem faciunt in capite XLIV. cuiusdam epistolæ ab eodem Gregorio scriptæ ab Aldricum. Qua occasione poterant etiam istam generalem, quæ magni momenti erat, recensere.

Memorable etiam est decretum synodi habitæ anno DCCCXXXVIII. apud Carisiacum, quod refertur in capite quinquagesimo eorundem gestorū, & quo secundum canonem octavum Chalcedonensem ceterasque regulas ecclesiasticas monasterium Anisolense sive sancti Carilephi declaratur debere esse subiectum Episcopo Cenomanensi, in cuius diœcesi situm est.

PRÆFATIO.

Verùm ea omnia in diversum ferme mutata postea sunt regnante Karolo Calvo , primùm quidem anno DCCCLVI. in synodo quinque provinciarum apud Bonoilum, dein apud Pistas post sexennium, postremò in Vermeria palatio anno DCCCLXIV. Utrarumque istarum synodorum decreta vulgabimus in nova nostra collectione Conciliorum.

Vitam optimi doctissimique Cardinalis Dominici Capranicæ à Baptista Poggio scriptam debere me lubens profiteor Eminentissimo doctissimoque Cardinali Casanattæ, qui illam describi curavit ex veteri codice collegii Romani vulgò Capranicensis dicti. Fuit autem iste Poggius celeberrimi illius Poggii Florentini filius, ac, nisi conjectura fallit, auctor ac fundator Augustinianorum discalceatorum. Narrat enim Augustinus Iustinianus Episcopus Nebiensis in libro quinto annalium Genuensium fol. CCXXVI. floruisse anno MCCCCLXXII.

PRÆFATIO.

Baptistam Poggium virum doctissimum, ut aperte demonstrant varia ejus opera, illumque initium dedisse congregationi Augustinianorum quos diximus, fuisseque valde amatum à Carolo Rege Francorum & à Galeacio Duce Mediolanensi. Extat in veteri codice MS. Bibliothecæ Colbertinæ oratio ad Romanum Pontificem Nicolaum V. habita per alterum ex filiis Poggii, sanè eleganter scripta, ac fortassis ab isto Baptista. Porrò vir clarissimus Odoricus Raynaldus aliquot istius vitæ fragmenta suis annalibus inseruit, descripta, ut res ipsa loquitur, ex eodem veteri codice ex quo nos habuimus.

Vitæ clarissimi Cardinalis subjunctum tractatum adversus eum illo tempore editum à quodam Iordano Bricio Iuriconsulto Aquisextiensi, non quòd illum magni faciam, sed ut hinc etiam colligant boni doctique omnes etiam summos sanctosque viros vitare interdum non posse dentes malignitatis.

P R Æ F A T I O.

Nam hic Iordanus pessimè loquitur de viro quem ceteri omnes illius ætatis homines, & inter hos sanctus Antoninus Archiepiscopus Florentinus, summis laudibus efferunt.

Itinerarium Adriani V I. editum quidem fuit Toleti anno M D X L V I. per Ioannem ab Ayala typographum, curante Blasio Garaio. Verùm cùm ea editio sit rarissima, ac multa contineat notatu digna, & vix aliquis literatorum sit qui illam viderit, rem universo huic ordini gratam me facturum putavi si illam recuderem.

Porrò cùm in hoc libro ediderim vitam sancti Geraldii Archiepiscopi Bracarenfis, cuius socius, amicus, ac successor fuit Mauritius Burdinus, usus sum hac occasione ut vitam quoque istius darem à me elaboratam. Videbam enim virum clarissimum, bene olim de Ecclesia meritum, indignissimè tractari à vulgo historicorum, cùm interim certissimum sit ea omnia falsa esse quæ ab illis afferuntur ad ob-

PRÆFATIO.

scurandam gloriam tot illustrium ejus
bene factorum. Debebam primùm
hanc curam veritati, cujus amatores
esse debemus omnes, tum patriæ meæ,
quæ summum hunc virum genuit.
Spero autem eos qui nihilo minùs
malè sentire ac scribere de Burdino
voluerint, mihi condonatuos hunc
affectum. Tu certè, lector erudite,
condonabis, scio; atque id mihi satis
est. Vale.

